



**KEMENTERIAN PERPADUAN NEGARA
PERPUSTAKAAN NEGARA MALAYSIA**

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

**MAJLIS PERASMIAN
PROGRAM JOM BACA BERSAMA 10 MINIT
SEMPENA HARI BUKU DAN HAK CIPTA SEDUNIA**

**22 APRIL 2025 (SELASA)
10.00 PAGI – 12.30 TENGAH HARI
CENTRAL SQUARE, SUNGAI PETANI,
KEDAH**

Terima kasih Pengacara Majlis.

Salam Perpaduan dan Salam Malaysia MADANI.

****Salutasi akan dikongsikan kemudian***

PENDAHULUAN

1. Pada pagi ini, kita berhimpun bagi meraikan **Majlis Perasmian Program Jom Baca Bersama 10 Minit 2025 dan Baucar Buku Semarak Membaca 2025** yang diadakan sempena **Hari Buku dan Hak Cipta Sedunia** yang disambut pada setiap 23 April.
2. Tahniah diucapkan kepada Perpustakaan Negara Malaysia atas pelaksanaan inisiatif ini. Usaha ini mampu **menyemarakkan kembali budaya membaca**, malah sejajar dengan **hasrat negara mewujudkan masyarakat berpengetahuan – *Knowledgeable Society***.
3. **Perpustakaan sebagai gedung ilmu mempunyai peranan yang amat signifikan dalam membangunkan sesebuah negara**. Saya amat berharap agar institusi perpustakaan dapat diserlah dan disedari akan kepentingannya sebagai pemangkin kepada kemajuan ekonomi termasuk juga politik, sosial, pendidikan dan kebudayaan negara ini.

4. Kini, di **Malaysia** terdapat sebanyak **1,076** buah perpustakaan desa (**506** di bawah PNM dan **570** di bawah negeri) yang memberi perkhidmatan kepada seluruh rakyat **Malaysia** dari **Perlis** hingga ke **Sabah**. Ini tidak termasuk perpustakaan universiti, perpustakaan awam negeri, perpustakaan di agensi kerajaan dan termasuklah pusat sumber sekolah yang keseluruhannya berjumlah sebanyak **13,674** buah.

Hadirin yang saya hormati sekalian,

MEMBACA SEBAGAI SATU GAYA HIDUP

5. Berdasarkan **Kajian Profil Membaca 2022/2023**, jumlah buku yang dibaca dalam tempoh setahun meningkat kepada **24** naskhah berbanding **15** naskhah pada tahun **2014**.
6. **Budaya membaca wajar dijadikan sebagai satu gaya hidup dalam kalangan rakyat Malaysia**. Amalan membaca adalah langkah pertama kepada segala kemajuan dan menjadikan manusia lebih berdaya maju dan matang dari segi pemikiran. **Kemajuan negara dan ketamadunan bangsa dapat dikembangkan dan dipertingkatkan jika bangsa itu berfikiran tinggi yang lahir dari amalan membaca**.

7. Selari dengan matlamat tersebut, Kementerian Perpaduan Negara menerusi Perpustakaan Negara Malaysia telah melaksanakan sebanyak **48,686 program galakan membaca pada tahun 2024.**

8. Antaranya **Program Jom Baca Bersama 10 Minit**, iaitu sebuah inisiatif bermakna yang bertujuan untuk menyemarakkan budaya membaca dalam kalangan rakyat Malaysia. Saya percaya bahawa usaha kita hari ini, walaupun hanya 10 minit tetapi ia mampu memberi impak besar jika ia menjadi amalan harian dalam kehidupan masyarakat kita. Bak kata pepatah, “sedikit-sedikit, lama-lama jadi bukit.”

Hadirin yang saya kasihi sekalian,

BAUCAR BUKU SEMARAK MEMBACA 2025

9. **Kerajaan MADANI sentiasa komited dalam usaha untuk meringankan beban rakyat, terutamanya dalam aspek pendidikan dan akses kepada sumber ilmu.** Antara inisiatif yang dilaksanakan termasuklah pemberian **baucar buku**, yang bukan sahaja membantu meringankan kos pembelian bahan bacaan, malah secara langsung dapat **memupuk dan memperkasa budaya membaca** dalam kalangan masyarakat.

10. Hari ini, saya akan melancarkan **Baucar Buku Semarak Membaca 2025** iaitu sebuah inisiatif oleh **Perpustakaan Negara Malaysia** dengan kerjasama antara **Persatuan Penerbit Buku Malaysia, Majlis Buku Kebangsaan Malaysia, Persatuan Penjual Buku Malaysia, dan Majlis Penerbitan Ilmiah Malaysia.**
11. Untuk makluman semua, program ini telah berjaya dilaksanakan pada tahun **2021** dengan peruntukan sebanyak **RM1,000,000.00** dengan penerima manfaat seramai **88,500** penerima **baucar** dan pada tahun **2022** sebanyak **RM2,000,000.00** kepada **190,000** penerima.
12. **Program ini diteruskan pada tahun ini dengan peruntukan sebanyak RM1,000,000.00.** Insentif ini adalah bertujuan untuk membantu dan meringankan beban rakyat dalam pembelian bahan-bahan ilmiah serta menggalakkan perbelanjaan domestik bagi merancakkan lagi industri perbukuan negara.
13. Kementerian Perpaduan Negara berterima kasih kepada pihak **Shopee, sebagai rakan e-dagang rasmi** Perpustakaan Negara Malaysia. Melalui jalinan kerjasama ini, Shopee telah bersetuju untuk memudahkan penebusan **baucar**, memperluas akses kepada buku berkualiti dengan harga mampu menyumbangkan **baucar Shopee Live** bagi menggalakkan lebih ramai rakyat

Malaysia membeli buku dan membaca. Usaha murni ini boleh menjadi contoh kepada syarikat-syarikat lain bagi membentuk budaya membaca dalam kalangan rakyat Malaysia.

Hadirin yang saya muliakan sekalian,

PENUTUP

14. Budaya pembacaan adalah asas penting dalam membentuk masyarakat yang maju, berilmu dan berakhlak tinggi. Membaca bukan sekadar satu hobi, tetapi satu keperluan dalam kehidupan masyarakat kerana membaca adalah kunci kepada ilmu, kebijaksanaan, dan kejayaan dalam hidup.
15. Saya juga ingin mengajak semua untuk menyahut seruan Kempen Jom Baca Bersama 10 Minit sebagai langkah awal dalam membudayakan pembacaan.
16. Sebelum bermohon diri, izinkan saya berkongsi serangkap pantun:

Buah berangan lebat di hujung,
Dahan putus jatuh ke paya,
Faedah membaca tidak terhitung,
Bangsa membaca bangsa berjaya.

Akhir kata, saya dengan sukacitanya **merasmikan Program Jom Baca Bersama 10 Minit 2025 dan Baucar Buku Semarak Membaca 2025.**

Sekian, terima kasih.